

律



陸士龍文集卷之一

晉陸

雲士龍著

明徐日曦閣仲閱

賦箴

逸民賦

并序

富與貴人之所欲也而古之逸民或輕天下細萬物而欲專一丘之歡擅一壑之美豈不以身



聖於宇宙而恬貴於紛華者哉故天地不易其  
樂萬物不干其心然後可以妙有生之極享無  
疆之休也乃爲賦云世有逸民兮栖遲乎於一  
丘委天刑之外心兮淡浩然其何求陋此世之  
險隘兮又安足以盤遊杖短策而遂往兮乃枕  
石而漱流載營抱魄懷元執一傲物思寧妙世  
自逸靜芬響於永言滅絕景於無質相荒土而

卜居度山河而考室曾丘翳莽穹谷重深藪木  
振穎葛藟垂陰潛魚泳沚嚶鳥來吟仍疏圃於  
芝薄兮即蘭堂於芳林靡炎飈以赴節兮揮天  
籟而興音假樂噐於神造兮詠幽人於鳴琴挹  
迴源於別沼兮食秋菊於高岑蒙玉泉以濯髮  
兮臨濬谷而設簪寂然尸居儼焉山立遵渚龍  
見在林鳳戢遁綿野以宅心望空巖而凱入明



發悟歌有懷在昔賓濮水之清淵兮儀磻溪之  
一壑毒萬物之誼譁兮聊漁釣於此澤爾乃薄  
言容與式宴盤桓朝挹芳露夕玩幽蘭眇區外  
而放志兮眷天路而怡顏望靈嶽之清景兮想  
佳人於雲端悲滄浪之濁波兮詠芳池之清瀾  
鄙終南之辱節兮躋伯陽之考槃眄清霄以寄  
傲兮泝凌風而頽嘆玄微載晏何思何欲漂若

行雲之浮泊若窮林之木咨有得之必喪兮蓋  
居龐之名辱彼貪夫之死權兮固遺生以要祿  
竦戰兢而履冰兮稊肅懷以臨谷亮據鼎之無  
慄兮在顛沛其必渥是故夫形現者徵咎體壯  
者爲犧雖明文而龍藻兮終俛首而受羈立脩  
名於禍始兮登全生於戾階資朝華之促節兮  
抱千載之長懷擠考終於遠期兮顛靈根而自



摧殉有喪之假樂方無身其孰哀美達人之玄  
覽兮邈藏器於無爲物有自遺道無不可萬殊  
有同齊物無寡竝家於國等朝於野榮在此而  
貴身兮神居形而忘我欽妙古之達言兮信懷  
莊而悅賈憎旣明於天爵兮何憊於人禍陋國  
風之皇恤同明哲於大雅亂曰乘白駒兮皎皎  
遊穹谷兮藹藹尋峻路兮崢嶸臨芳水兮悠喬  
槃丘園兮暇豫翳翠葉兮重蓋瞻洪崖兮清輝  
紛容與兮雲際欲凌霄兮從之恨穹天兮未泰  
詠歡友兮清唱綸爾音兮此世

逸民箴

并序

余昔爲逸民賦大將軍掾何道彥大府之俊才  
也作反逸民賦盛稱官人之美寵祿之華靡偉  
名位之大寶斐然其可觀也夫名者實之賓位



者物之寄窮高有必顛之吝溢美有大惡之尤可不慎哉故爲逸民箴以戒反正焉

浩浩太素制爲兩儀經始君臣朝有俊弼野有逸民各有攸屆而後品物有倫在昔后帝齊物達觀賞不假爵教不示勸號謚莫設而生黎淳晏降迄中古黃象可觀而唐文有煥乃彫乃藻大樸旣散樸之旣散萬百熙心形爲寵放神爲

利淫有翹者車命彼在林是故懷玉喪寶而被褐解襟恬亡智生與世或兢匪智無鑒匪心伊鏡芒芒禹迹鞠爲塗徑惟是每懷偏彼反正正反於寵旣尸干祿相協厥居而豐其屋祿之旣尸刑爲爾司屋之旣豐喪家於宮故非據之災戒之在凶人皆知存之爲存而莫知得之爲喪榮猶振穎墜若頽荒咎自專寵福在循牆是故



保其安者常危而忘其存者不亡無休爾榮身  
寔親名無謂爾崇神期好冲戒彼覆餗冒此棟  
隆慎微如顯乃保身以終自古在昔逸民有作  
相彼宇宙方之委烏夫豈無不休而好是冲漠  
是故名利之災至人攸恪謂予未信無寧監於  
桑霍天明旣畏神道無親善在求已慶繇積仁  
無念爾本聿修厥淳執盈如虛乃反天真逸民

司正敢告官人

歲暮賦

并序

余祗役京邑載離永久永寧二年春黍寵北郡  
其夏又轉大將軍右司馬於鄴都自去故鄉荏  
苒六年惟姑與姊仍見背棄銜痛萬里哀恩傷  
毒而日月逝速歲聿云暮感萬物之旣改瞻天  
地而傷懷乃作賦以言情焉



夫何乾行之變通兮昏明迭而載路美飛轡之  
遠御兮騰六龍於天步時赴節而漸流兮氣移  
數而改度揮促節於短日兮振修策於長夜運  
攸忽其既周兮歲冉冉而告暮變棘心之柔風  
兮滋萋草之湛露玄暉邈以峻服兮黃裳皓而  
振素於是顓頊御時玄冥統官天廟既底日月  
貞觀淪重陽於潛戶兮嚴徵積陰於司寒日回

天以滅景兮飈衝淵而無瀾堅冰涸於川底兮  
白雪隕於雲端普區宇之瘁景兮頓萬物之衰  
顏時稟戾其可悲兮氣蕭索而傷心淒風愴其  
鳴條兮落葉翻而灑林獸藏丘而絕迹兮鳥攀  
木而栖音山振枯於曾嶺兮民懷慘於重襟寒  
與暑其代謝兮年冉冉其將老萋顏曄而朝兮  
玄髮粲其夕皓感芳華之志學兮悲時暮而難



考遠圖逝而辭懷兮密思集而盈抱羨厚德之  
溥載兮嘉彗化之大造恨盛來之苦晏兮悲衰  
至之常蚤指晞露而怵心兮衍死生於靡草蒙  
時來之嘉運兮遊上京而凱入委乘輅於紫宮  
兮剖金虎而底邑憑台光之發暉兮荷寵靈而  
來集望故疇之迥遼兮沂南風而頽泣長難息  
而永懷兮感逝物而傷悲哀年歲之攸往兮伊

行人之思歸結隆思於朝日兮綴永念於紀暉  
表寸陰而貞吝兮盼盈尺其若遺嗟我行之久  
永兮何歸途之茫茫憇遵渚於川盼攸逝兮江  
湘處孝敬於神丘兮結祗慕於帷桑瞻山川而  
物存兮思六親而人亡問仁姑而背世兮及伯  
姊而淪喪尋餘蹤於空宇兮想絕景於遺堂悲  
山林之杳藹兮痛萃構之丘荒靖深情以遐慕



兮思纏綿而懷楚涕垂頤以交頹兮哀凌心而  
洞駭神尋路而窘逝兮形頻蹙乎其所心悠悠  
其若懸兮音旣絕而復舉悲人生之有終兮何  
天造而罔極仰悲谷之方中兮顧懸車而日昃  
百年迅於分噓兮千歲疾於一息詠大椿之萬  
穰兮同蟪蛄於未識歲難停而易逝兮情艱多  
而泰寡年有來而棄子兮時無算而非我祇生

心於日順兮雖呼翕其難假攝僣生於逆旅兮  
欲淹畱其焉可彼鑿寐之有時兮亦始卒之固  
然舒遠懷於千載兮悵同感乎中山鑿通人之  
炯戒兮懼晏平之達言啟貞心以自買兮覽遺  
籍而問道亮爽鳩之旣徂兮故營丘之有紹在  
吾儕之陋心兮豈取樂於東表苟長生而自得  
兮將奚待而有天考大德於天地兮知斯言之



益矯

愁霖賦

永寧三年夏六月鄴都大霖旬有竒日稼穡沉  
湮生民愁瘁時文雅之士煥然竝作同僚見命  
乃作賦曰在朱明之季月兮反極陽於重陰興  
介丘之膚寸兮墜崩雲而洪沉谷風扇而攸遂  
兮苦雨播而成淫天決漭以懷慘兮民嘖蹙而

愁霖於是天地發揮陰陽交烈萬物混而同波  
兮玄黃浩其無質雷憑虛以振庭兮電凌牖而  
輝室雷鼎沸以駿奔兮潦風驅而競疾豈南山  
之暴濟兮將冥海之蹇溢隱隱填填若降自天  
高岸渙其無涯兮平原蕩而爲淵遵渚回於凌  
河兮黍稷什於中田匱多稼於億庚兮虛風敬  
於祈年外薄郊甸內荒都城陰無晞景雷無輟



聲織波靡於前途兮微律隔於峻庭紛雲擾而  
霧塞兮漫天頽而地盈於是愁音比屋歎發屢  
省陽堂乏暉朗室無景望曾雲之萬仞兮想白  
日之寸脛感虛無而思深兮對寂莫而言靖毒  
甚雨之未晞兮悲夏日之方永瞻大辰以頽息  
兮仰天衢而引領愁情沉疾明發哀吟永言有  
懷感物傷心結南枝之舊思兮詠莊舄之遺音

羨弁彼之歸飛兮寄予思乎江陰渺天末以流  
目兮涕潺湲而沾襟何人生之倏忽痛存亡之  
無期方千歲於天壤兮吾固已陋夫靈龜矧百  
年之促節兮又莫登乎期頤哀戚容之易感兮  
悲懽顏之難怡考傷懷於衆苦兮愁豈霖之足  
悲雲曇曇而疊結之兮雨淫淫而未散晞朱陽  
於崇朝兮悲此日之屢晏劾豐隆於岳陽兮執



赤松於神館命雲師以藏用兮繼乘龍於河漢  
照濛汜之清暉兮炳扶桑之始旦考幽明於人  
神兮妙萬物以達觀

喜霽賦

余旣作愁霖賦雨亦霽昔魏之文士又作喜霽  
賦聊厠作者之末而作是賦焉

毒霖雨之掩時兮情懷憤而無懌肅有禱於人

謀兮反極陰於天律靖屏翳之洪隧兮戢大山  
之觸石凌風絕而謐寧兮歸雲反而揮霍改望  
舒之離畢兮曜六龍於紫閣揚天步之剡剡兮  
播靈輝之赫奕於是朱明自皓凱風來南復火  
正之舊司兮黜后土於重陰夷中原之多潦兮  
反高岸於嵩岑萎禾竦而振穎兮偃木豎而成  
林嘉大田之未墜兮幸神祇之有歆爾乃俯順



習坎仰熾重離兼明暢而天地擘兮羣生悅而  
萬物齊魚凌淵以增躍兮鳥栖林而朝隤戢流  
波於枉水兮起芳塵於沉泥朱光播於甕牖兮  
素景衍乎中閨天監作照幽明畢覲普厥有權  
單及四國翕萬情而咸喜兮雖無獲而自得災  
未及周和斯有祥翼翼黍稷油油稻粱望有年  
於自古兮晞隆周之萬箱原思悅於蓬戶兮孤

竹欣於首陽陰陽交泰萬物方遒炎神送暑素  
靈迎秋四時逝而代謝兮大火忽其西流年冉  
冉其易頽兮時靡靡而難畱嗟沉哀之愁思兮  
瞻日月而增憂感年華之行暮兮思乘煙而遠  
遊命海若以量津兮吾欲往乎瀛洲臨儀天之  
大川兮凌懷山之洪波瞻增城之峻極兮仰蓬  
萊之峩峩望王母於弱水兮詠白雲之清歌雖



嘉命之未錫兮將輕舉於流沙振仙車之鳴鸞  
兮吐玉衡之八和託芝蓋之後乘兮食瓊林之  
朝華修無窮以容與兮豈萬載之足多

登臺賦

永寧中叅大府之佐於鄴都以時事巡行鄴官  
三臺登高有感因以言崇替迺作賦云

承后皇之嘉惠兮翼聖宰之威靈肅言而述業  
兮乃啟行乎北京巡華室以周流兮登崇臺而  
上征攀凌坻而遂躋兮迄雲閣而少寧爾乃佇  
眄瑤軒滿目綺寮中原方華綠葉振翹嘉生民  
之亶亶兮望天晷之苕苕歷玉階而容與兮憇  
蘭堂以逍遙蒙紫庭之芳塵兮駭洞房之迴飈  
頽嚮逝而迂物兮傾冠舉而凌霄曲房榮而窈  
眇兮長廊邈而蕭條於是迴路季夷邃宇玄芒



深堂百室曾臺千房闢南牕而蒙暑兮啟朔牖  
而履霜遊陽堂而冬溫兮步陰房而夏涼萬禽  
委地於潛室兮驚鳳矯翼而來翔紛譎譎於有  
象兮邈攸忽而無方於時南征司火朱明鬱遂  
縣車式徐曜靈西墜暑乘陰而增炎兮景望淵  
而曖昧玩瓊宇而情歎兮覽八方而思銳陋雨  
館之常規兮鄙鳴鵠之蔽第仰凌眄於天庭兮

俛旁觀乎萬類北溟浩以揚波兮青林煥其興  
蔚扶桑細於毫末兮崑崙卑乎覆篲於是忽焉  
俛仰面天地旣必宇宙同區萬物爲一原千變  
之常鈞兮齊億載於今日彼區中之側陋兮非  
吾黨之一室本達觀於無形兮今何求而有質  
於是聊樂近遊薄言儻佯朝登金虎夕步文昌  
綺䟽列於東序朱戶立乎西廂經蕤擘以披藻



兮椒塗馥而遺芳感舊物之咸存兮悲昔人之  
云亡憑虛檻而遠想兮審歷命於斯堂於是精  
疲遊倦白日藏輝鄙春登之有情兮惡荆臺之  
忘歸聊弭節而駕言兮悵將逝而徘徊感崇替  
之靡常兮悟廢興而永懷隆期啟而雲升逝運  
靡其如頽長發惟祥天鑒在晉肅有命而龍飛  
兮跚重斯而肇建嘉有魏之欽若兮鑒靈符而

告禪清文昌之離宮兮虛紫微而爲獻委普天  
之光宅兮質率土之黎彥欽哉皇之承天集北  
顧於乃眷誕洪祚之遠期兮則斯年於有萬

南征賦

并序

太安二年秋八月奸臣羊玄之皇甫商敢行稱  
亂逼乘輿天子蒙塵于外自秋徂冬大將軍  
敷命群后同恤社稷乃身統三軍以謀國難自



義聲所及四海之內朔漠之表蒸徒羸糧而請  
奮胡馬擬塞而思征四方之會衆以百萬軍旅  
之盛威靈之著自古已來未之有也粵十月軍  
次于朝歌講武洽戎以觀兵于殷墟於是美義  
征之舉壯師徒之盛乃作南征賦以揚匡霸之  
勲云爾

有皇晉之霸后資濬哲之獻聖崇文德於緝熙

濟武功而保定應天鑒之昭華荷帝祐之休命  
步玉衡以觀八方在璇璣而齊七政芒芒神道  
化洽崇深印戾天飛俯洞淵沉振南箕以鼓物  
冒慶雲而崇蔭■天維以籠世廓宇宙而宅心  
濟博施之厚德鏗希聲之大音淵澤回而泣注  
豪彥萃而爲林九服惟清諸夏謐靜肅慎回首  
沙漠引領天和時降地靈夙挺結芳林之竒幹



珍禾之神穎勵修德於億兆端澄形於萬景  
在中葉之不兢遭皇家之毒亂悲國步之未夷  
仰夙興而昧旦括無方而大誥集率土而貞觀  
致天屬於王畿肅有征而省難爾乃建黃鉞之  
靈威樹戎輅之高蓋伐隱天之雷鼓振凌霄之  
電旆介天揮戈而夙興輕武總千而啟萬振靈  
韶之嘈嘈飛旗旒之藹藹虹旃泝風以委蛇霓  
旄蒙光而容裔公徒十萬其會雲興悠悠華戎  
時罔丕承爾乃命屏翳以夕降式飛廉以朝升  
塗蒙雨而復清景帶天而光澄陪武臣於彫軒  
列名僚於後乘猛將起而虎嘯商飈肅其來應  
士憑威而嚮駭馬獻天而景凌臨川屯於廣陸  
武騎被乎中陵類禡比京師徒經始栢栢先征  
在河之涘順彼長道懸旌千里美王師之遵時



茂七德而發止爾乃稅駕殷墟我徒旣閑順時  
講武薄狩于原紛同方而類聚煥副翼而明分  
祇明刑以誓衆習軍政於舊聞儼山立以崇蒼  
粲煙駭而興紛若冥海之引回流岱靈之吐行  
雲于時玄冬首時陰風戒煞山澤含哀天地肅  
又閑夜冽以澄清中原曠而曖昧戎士肅而咸  
戒三軍紛而雜遝長角哀叫以命旅金鼓隱訇

而啟伐景凌冥而四播音乘雲而上逝火烈具  
舉伐鼓淵淵朱光俛而丹野炎暉仰而絳天曜  
靈翕赫以增熾憤氣拂悅而凌煙狂飈起而妄  
駭行雲藹而千眠旌旆翻其猗靡驚燦因而嬾  
媚爾乃洪音雷瀆■問尅廣凌雲發揮萬里振  
響聲馮虛而天回烈駭■而地蕩映皓月而望  
舒闇照重昏而大夜朗服縣炎揚而晃儵飛烽



戢煜而決漭乃有熊羆之旅虓闕之將雄聲泉  
涌逸氣風亮超三軍以奔厲賈餘勇而成壯兆  
洪音於寂莫先無形而高唱紛若屯雲渙若積  
波遁■陰景靜言勿譁絕倡寂其旣收萬夫翕  
而咸和嚴鼓隱而重戒景燧曄而星羅烈蒙陰  
而邛假曜憑陽而登遐若扶桑之振華葉皓天  
之散朝霞超燭龍之絕景豈比象於百華

寒蟬賦

并序

昔人稱雞有五德而作者賦焉至於寒蟬才齊  
其美獨未之思而莫斯述夫頭上有綉則其文  
也含氣飲露則其清也黍稷不食則其廉也處  
不巢居則其儉也應候守節即其信也加冠冕  
取其容君子則其操可以事君可以立身豈非  
至德之虫哉且攀木寒鳴貧才所

另本有不  
空二字歎



余昔僑處切有感焉興賦云爾  
伊寒蟬之感運近嘉時以遊征含二儀之和氣  
稟乾元之清靈體貞精之淑質吐啾啞之哀聲  
希慶雲以優遊遁太陰以自寧於是靈岳幽峻  
長林參差爰蟬集止輕羽涉池清澈微激德音  
孔嘉承南風以軒景附高松之二華黍稷惟馨  
而匪享竦身希陽乎靈和唳乎其音翩乎其翔

容麗蜩螗聲美宮商颺如飛焱之遺驚風眇如  
輕雲之麗太陽華靈鳳之羽儀渚皇都乎上京  
跨天路於萬里豈蒼蠅之尋常爾乃振修綏以  
表首舒輕翅以迅翰華之墜露含煙煜以夕食  
望北林以鸞飛集樛木以龍蟠彰淵信於嚴時  
稟清誠乎自然翩眇微妙綿蠻其形翔林附木  
一枝不盈豈黃鳥之敢希唯鴻毛其猶輕憑綠



葉之餘光哀秋華之方零思鳳居以翹竦仰竚  
立而哀鳴若夫歲聿云暮上天其涼感運悲聲  
貧士含傷或歌我行永久或詠之子無裳原思  
嘆於蓬室孤竹吟於首陽不銜子以穢身不勤  
身以營巢志高於鳴鳩節妙乎鷓鴣附枯枝以  
永處何瓊林之迥翛惟雨雪之霏霏哀北風之  
飄颻旣乃彫以金采圖我嘉容珍景曜爛曄曄

華彗竒侔黼黻艷比袞龍清和明潔群動希蹤  
爾乃綴以空冕增成首飾纓蕤翩紛九流容翼  
映華虫於朱袞表馨香乎明德於是公侯常伯  
乃紆紫黻執龍淵俯鳴珮玉仰撫貂蟬袷黃廬  
之多士光帝皇之待人旣騰儀像於雲闈望景  
曜乎通天邁休聲之五德豈鳴鷄之獨珍聊振  
思於翰藻闡令問以長存於是貧居之士喟爾



相與而俱歎曰寒蟬哀鳴其聲也悲四時云暮  
臨河徘徊感北門之憂殷嘆卒歲之無衣望泰  
清之巍峩思希光而無階簡嘉蹤於皇心冠神  
景乎紫微詠清風以慷慨發哀歌以慰懷

陸士龍文集卷之一

終

陸士龍文集卷二目錄

詩

四言失題

征西大將軍京陵王公會射堂皇太子見

命作一首

大將軍宴會被命作一首

大尉王公以九錫命大將軍讓公將還京



邑祖餞贈一首命大將軍蕭公深嚴京

太安二年夏四月大將軍出祖王羊二公

於城南堂皇被命作一首

從事中郎張彥明為中護軍一首

贈顧驃騎後二首

贈汲郡太守

陸士龍文集卷二目錄

終

陸士龍文集卷之二

晉陸雲士龍著

明徐日曦閻仲閱

詩

四言失題

前八章  
後六章

悠悠懸象昭回太素清濁迭興升降啟度遺和

既爽季春告暮朱明來思青陽受煦



日征月盈天道變通大初陶物造化爲功四月  
惟夏南征觀方凱風有集飄飄南窗思樂萬物  
觀異知同

有奄萋萋甘雨未播黍稷方華中田多稼庭槐  
振藻園桃阿薄言觀物在堂知化  
蓬戶惟清玩物一室明發有懷念昔先哲通夢  
幽人彷彿遺烈清暉在天孰與永日

乃啟遺籍思予大觀幽居傲物顧景怡顏况惟  
解舞衡門重關思媡古人有懷良盤沉曦含輝  
芳烈如蘭

厥初生民有物有類自古有稱大寶以位征徒  
式好俊奔攸遂啟予有聞誨爾達貴  
達貴伊何天爵無榮渾乎太昧混其濁清毀方  
遁象遺頑履貞道實藏噐景以昭形



芒芒陋世奚競奚錯牧彼紛華委之冲漠漂志  
垂天矯心馮閣通好莊聃儀形有作安得達人  
顧予命薄

思樂芳林言采其菊衡薄遵塗中原有菽登彼  
修巒在林寤宿彷彿佳人清顏如玉

予美亡此誰爲適道容與俟之玄髮方皓躑躅  
山阿玩此芳艸願食其穎庶以遺老

亶亶嘉時飄忽棄予有瞻逝深永嘆潛滸登願  
扶棗仰結飛晷伊人匪存遺芳孰與

精氣爲物或降或升徂落攸往神奇有登死生  
爲徒存亡曷勝謂予不信遺藉有徵

閑居外物靜言樂幽繩樞增結甕牖綢繆和神  
當春清節爲秋天地則爾戶庭已悠

嗟我懷人悠悠其潛念昔先烈有懷所欽駭情



玩世堂允南金瓊輝邈矣誰適爲心明發興言  
忼慨芳林

征西大將軍京陵王公會射堂皇太子見

命作此詩

六首

芒芒大極玄化烟煨頽形成噐凌象垂文大鈞  
造物庶類群分先識經始實綜彛倫

惟岳隆周生甫及申天監在晉祚之降神邈矣

遐風茂德有隣永言配命唯晉之鎮

厥鎮伊何實幹心膂文教內輔武功外禦淮方

未靖帝曰攸序公于出征奄有南浦

南海旣賓爰戢干戈桃林釋駕天馬婆娑象齒

南金來格皇家絕音協徽宇宙告和

玄綱峻極天罔旣紘文武方并允茲兼弘峩峩

高夏有肅其涼公侯戾止駮驥龍驤善問如林



在會鏘鏘祝融銜節火正緝熙凱風徘徊萬物  
欣時秩秩初筵薄言在茲嘉福介祐萬壽無期

大將軍宴會被命作此詩

六首

皇皇帝祐誕隆駿命四祖正家天祿保定叡哲  
惟晉世有明聖如彼日月萬景攸正

巍巍明聖道隆自天則分明喪觀象洞玄凌風  
叶極絕輝照淵肅雍往播福祿來臻

在晉姦臣稱亂紫微神風潛駭有赫茲威靈旗  
樹旆如電斯揮致天之屆于河之沂有命再集

皇輿凱歸

頽綱旣振品物咸秩神道見素遺華反質辰晷  
重光協風應律函夏無塵海外有謐

芒芒宇宙天地交泰王在華堂式宴嘉會玄輝  
峻朗翠華崇藹冕弁振纓藻服垂帶



祁祁臣僚有來雍雍薄言載考承顏下風喜覲  
嘉客仰瞻玉容施已唯約于禮斯豐天錫難老  
如岳之崇

太尉王公以九錫命大將軍讓公將還京

邑祖餞贈此詩

六首

列文辟公時惟哲王闡縱絕期平顯幽光內實  
慎徽緝熙有臧出紂方慝間督不揚高山峻極

天造芒芒

天子念功大典光備肅肅王命宰臣蒞事穆矣

淵讓遺功遂志思我遠猷徽音孰嗣

后命旣靈王人反旆興言出祖飲餞于邁於旄

泱泱輶軒藹藹和風弭塵清暉映蓋

思樂中陵言觀其川公王戾止有車麟麟伊誰

云饗我有嘉賓羽觴舉酬酢爾征人



悠悠征人四牡駢駢發軫北京振策紫微昔乃  
云來春林方輝歲亦暮止之子言歸道途興戀  
伏載稱  
聖澤旣渥嘉會悃悃庭旅鐘鼓堂有瑟琴飛轡  
清暉扶桑移蔭視景祗慕揮袂沾襟變彼同栖  
悲爾異林我有旨酒以歌以吟

大安二年夏四月大將軍出祖王羊二公

於城南堂皇被命作此詩

六首

時文唯晉天祚有祥聖宰作弼受言旣臧有赫  
斯庸勲格昊蒼景物台暉棟隆玉堂  
惟常思庸大興光迪聖敬遠濟神道玄邈思媿  
三靈誕膺天篤嘉命旣辱主人言告  
翼翼主人言告惟慕公輿駕言乃眷斯顧華旂  
飛藻鳴鸞振路駢駢駟牡噓天載步



我有高廈如雲斯蒼彫軒矣止薄言嘉會問誰  
在宴惟俊惟乂豐俎殷薦獻酬交泰  
攸攸昊天南正興言朱明有暉萬葉翠繁昌雲  
垂天凱風熙顏王臣在此貽宴于懽  
懸象西頽虞淵納景嘉樂未晞 駕已整行矣  
征人身垂路飛駿顧懷華蟬引領遺思北京  
結轡臺省

贈顧驃騎後二首

有皇美祈陽也祈陽秉文之士駿發其聲故能  
明照有吳人顯乎晉國人美之故作是詩焉

有皇大晉時文憲章規天有光矩地無疆神篤  
斯祐本顯克昌載生之雋實惟祈陽哲問宣猷  
考茂其相

於鑠祈陽誕鍾天篤清輝龍見玄猷淵嘿沉機



響駭幽神廣覲和以同人歸物時育有大惡盈  
謙以自牧思我懿範萬民來服

吳未喪師天秩有庸淵哉若人弱冠休風俯翼  
黃門以德來忠端秀蕃后正色儲宮徵音鑠穎  
邈矣遐踪

皇維南終舊邦匪歆委弁釋位如龍之潛考槃  
穹谷假樂豐林子雖藏噐鐘鼓有音惠風徃敬

慶問來尋

濟濟元公相惟天子明明辟王思隆多士帝曰  
欽哉有命集止我咨四方令問在爾以朕大賚  
乃膺嘉祉聿來胥步觀國之紀

惟皇建極緝熙清曜我有駿民明德來照大觀  
在上主假有廟顯允顧生金聲玉振之子于升  
利見大人龍輝絕跡有肅清塵



清塵旣彰朝虛好爵敬子侯度慎徽百辟予聞  
有命德禮不易嗟我懷人瞻言永錫豐祐東法  
惟子之績

遵泫涉泗言告同征勁風宵烈湛露朝零雲垂  
藹下泉冽清泠哀哉行人感物傷情從子京邑  
言觀厥成天保祚德式穀以寧

思文美祁陽也祁陽能明其德刑於寡妻以至  
于家邦無思不服亦賴賢妃貞女以成其內教  
故作是詩焉

八首

思文祁陽祁陽克峻天錫淳嘏宣茲義問德音  
旣烈海外有奮旣奮斯音祗敬厥德照治其家  
覃及邦國永肇儀刑俾民惟則

文王在上大妣思齊魯侯克昌亦賴令妻鑒神  
有顧蘋繁在斯祁陽載天作之伉儷



在虞之胄實惟有姚穎艷玉秀華茂桃夭居顯  
祗明在靈格幽清塵熠爍淑心綢繆爰及祁陽  
惟德之周

其德伊何和貞虔告師民履素言謀慮度鐘鼓  
思樂靖端夙效考休攸嬪來嫁于顧  
羔羊執贄玉帛有輝百兩集止之子于歸宗姻  
風從娣姪雲回祁陽顧之煥其盈闈

旣日歸止式揚好音言觀河洲有集于林思樂  
葛藟薄采其葦疾皮攸遂乃孚惠心  
惠心旣孚有恪中饋敦此衆斯永錫嗣類載延  
窈窕用和寤寐神之聽之胤祚來爾

昔周之隆有妣如有內刑聖敬外崇多士今我  
淑人實亮君子亶亶翼翼亦繼斯祉宜爾子孫  
福祿盈止



從事中郎張彥明爲中護軍

并序

奚世都爲汲郡太守客將之官大將軍崇賢之  
德旣遠而厚下之恩又隆非此離析有感聖皇  
旣蒙引見又宴於後園感鹿鳴之宴樂詠魚藻  
之凱歌而作是詩

六首

思文有聖叡哲配天功濟生黎道合上玄休命  
發揮有集惟賢哲彼寤宿澄此在淵

濟濟多士實播令聞王曰欽哉余嘉乃勲徽音  
孔碩惠爾風雲穆此芳烈肇揚清芳

肅肅庶僚衮服寵暉肇彼桃虫假翼翻飛出撫  
邦家入翔紫微有命旣集願言永違

思樂華堂雲構崇基公王有酒薄言饗之景曜

徽

一作  
微

芒芳風詠時宴爾賓儉具樂于茲

亶亶我王豐恩允藏我客戾止飲酒公堂自彼



下僚聿來有光悲矣永言指塗逝將形違殿闈  
景附華房

開國承家勿用小人今我聖宰實蕃斯仁凌淵  
龍躍披林鳳振正直旣好嘉禮陳振我遠德  
歸于時民

贈汲郡太守

八首

於穆皇晉豪彥實蕃天罔振維有聖貞觀鳴鳥

在林良駿即閑萃羅俊乂時亮庶官  
抑抑奚生天篤其淳芳穎蘭揮瓊光玉振沉機  
照物妙思考神思我善問觀德古人

善問伊何惠音孔韶肇允衡門翻飛宰朝肅雍  
芳林芬響凌霄穆矣和風育爾清休

亦旣有試出宰邦家之子于行民固謳歌風澄  
俗儉化靜世波芒芒旣庶且樂于和



我有好爵旣成爾服入贊崇華遂登帷幄時文  
聖宰天祚方穀朔風微止鴻漸雲嶽  
悠悠斯民三代直道我求明德惟奚攸考緝熙  
暉章天祿來保惠心無兢豐化有造  
樂只君子茂德攸綏嗟我懷人式是言歸聿言  
來集如翼斯揮日予不惠照爾清暉  
職思旣殊亦各有司念我同僚悲爾異事之子  
之遠悠悠我思雖無贈之歌以言志

陸士龍文集卷之二 終



陸士龍文集卷之二

陸士龍集卷二

陸士龍文集卷之二

陸士龍文集卷三目錄

詩

兄平原贈  
附弟荅

贈鄭曼季往返八首

陸士龍集

卷三目錄



陸士龍文集卷之三

晉陸雲士龍著

明徐日曦閣仲閱

詩

兄平原贈

并序

余弱年夙孤與弟士龍銜卹喪庭續會逼王命  
墨經卽戎時竝縈髮悼心告別漸歷八載家邦



顛覆凡厥同生彫落殆半收迹之日感物興哀  
而龍又先在四時迫當祖載二昆不容逍遙銜  
痛東徂遺情西暮故作是詩以寄其哀苦焉  
於穆予宗稟精東嶽誕育祖考造我南國南國  
克靖實繇洪績惟帝念功載繁其錫其錫惟何  
玄冕袞衣金石假樂旄鉞授威匪威是信稱平  
遠德奕世台衡扶帝紫極

駕生三昆克明克俊遵途結轍承風襲問帝曰  
欽哉纂戎裂祚雙組式帶綬章載路即命荆楚  
對揚休顧肇敏厥績武功聿舉煙煜芳素綢繆  
江澣昊天不吊胡寧棄予

嗟予人斯胡德之微闕彼遺軌則此頑違王事  
匪監旂旆屢振委籍舊戈統厥征人祈祈征人  
載肅載閑駉駉戎馬有斲有翰昔予翼考惟斯



伊撫今予小子繆尋末緒  
有命自天崇替靡常王師乘運席江卷湘雖  
守守從武臣守局下列譬彼飛塵洪波雷擊  
與衆同泯巔跋西夏收迹舊京俯慙堂構仰懣  
先靈孰云忍媿寄之我情

伊我俊弟咨爾士龍懷襲瑰瑋播殖清風非德  
莫懃非道莫弘垂翼東畿耀穎名邦綿綿洪統

非爾孰崇依依同生恩篤情結義存竝濟胡樂  
之悅願爾偕老携手黃髮

昔我西征扼腕川澗掩涕卽路耀袂長辭六龍  
促節逝不我待自往迄茲曠年八祀悠悠我思  
非爾焉在昔竝垂髮今也將老銜哀茹感契闊  
克飽嗟我人斯胡卹之早

天步多艱性命難誓常懼隕斃孤魂殊裔存不



阜物沒不增壤生若朝風死猶絕景視彼浮遊  
方之僑客眷此黃廬譬之斃宅匪身是去亮會  
伊惜其惜伊何言紆其思其思伊何悲彼曠  
出車戒塗言告言歸辱食驚駕夙興宵馳濛雨  
之陰炤月之輝陸陵峻坂川越洪漪爰屆爰止  
步彼高堂失爾羽邁良願中荒我心永懷匪悅  
匪康

昔我斯逝兄弟孔仁今我來思或彫或疚昔我  
斯逝族有餘榮今我來思堂有哀聲我行其道  
鞠爲茂艸我履其房物存人亡拊膺涕泣血淚  
仍徨

企佇朔路言爾歸心存言宴目想容輝迫彼  
窀穸載驅東路繼其衆梓肆力丘墓婉兮變兮  
興懷罔極眷言顧之使我心惻



答

伊我世族太極降精昔在上代軒虞篤生厥生  
伊何流祚萬齡南嶽有神乃降厥靈誕鍾祖考  
憂沒齒憂懷惟何顧景惟塵峩峩高蹤眇眇賀  
辰明德繼體莫非哲人今我頑鄙規範靡遵仍  
世載德荒之予身莫峻匪岳有俊斯登莫高匪  
雲有高斯凌矧我成基匪克階升玄黃長坂載

寐載興豈敢憚行哀此負乘芒芒高山自予頽  
之濟濟德義匪予懷之終銜永負於其媿而昔  
予言曠汜舟東川銜憂告辭揮淚海濱羲陽趣  
駕炎華電征自我不見邈哉八齡悠思迴望寤  
言通靈昔我往矣辰在東嶠今我於茲日薄桑  
榆銜艱遘愍困瘁殷憂哀矣我世匪蒙靈休開  
元迄茲震興迭微弱風隱駭海水群飛王旅南



征闡耀靈威予昆乃播爰集朔土載離永久其  
毒太苦上帝休命駕言其歸多我邁愍振蕩朔  
垂羈繫殊俗初願用違嚴駕東征肅邁林野夕  
秣乘馬朝整僕旅矯矯乘馬載驅載馳漫漫長  
路或降或階晨風夙零朝不皇飢傾景儵墜夕  
不存罷雖有豐草匪釋奔駟雖有重陰匪遑假  
寐煢煢僕夫悠悠遄征經彼喬木有鳥嚶鳴微

物識儕矧伊有情樂茲棠棣實歡友生旣至旣  
覲滯思曠年曠年殊人覲未浹辰恨其永懷憂  
徹茲神明運步玉衡仰和太清賓御四門劬穆  
紫庭紫庭旣穆威聲爰振厥振伊何播化殊鄰  
清風攸被率土歸仁彤弧所彎萬里無塵功昭  
王府帝庸厥勲黃鉞授征錫命頻繁闕如薺虎  
肅茲三軍光若辰時亮彼公門仍世上司芳流



慶純雲和所產爰育二昆誕豐岐嶷夙邁令問  
令問伊何休音允臧先公克構乃崇斯堂耀穎  
上京發迹扶桑戎車山征時惟鷹揚鷹揚旣昭  
勲庸克邁天子命我鎮弼於外在作扞城以表  
南裔降災匪蠲景命顛沛惟我賢昆天姿秀生  
含竒播殊明德惟馨太陽散氣乃稟厥和山川  
垂度爰則厥遐厥遐伊何惟光惟大惟大伊何  
如岱如渭恢此廣淵廓彼洪懿弘道惇德淵哉  
爲噐統我先基弱冠慷慨將弘祖業實崇奕世  
咨予頑蒙蕞爾弱才沉耀玄渚挹庇雲淇陶化  
靡移固陋于茲瞻仰洪範實忝先基巍巍先基  
重規累構赫赫重光遐風激鷺昔我先公爰造  
斯猷今我六蔽匪崇克扶悠悠大道載邈載遐  
洋洋淵源如海如河昔我先公斯綱斯紀今我



未嗣乃傾乃圯世業之頽自予小子仰愧靈丘  
銜心孔艱天地永久命也難長生民忽霍曷去  
其常我之旣存靡績靡紀乾坤難竝寂焉其已  
生若電激沒若川征存愧松柏逝慙生靈匪去  
性命實悼徒生苟克析薪豈憚冥冥瞻企皇極  
徼福上天冀我友生要期永年昔我先公邦國  
攸興今我家道綿綿莫承昔我昆弟如鸞如龍  
今我友生凋俊隊雄家哲永徂世業長終華堂  
傾構廣宅頽墉高門降衡修庭樹蓬感物悲懷  
愴矣其傷惇仁汜愛錫予好音晞光懷寶煥若  
南金披華玩藻華若翰林詠彼清聲被之瑟琴  
味此殊響慰之予心弘懿忘鄙命之反覆敢投  
桃李以報寶玉冀憑光蓋編諸末錄

贈鄭曼季往返八首



谷風懷思也君子在野愛而不見故作是詩言其懷思之也

習習谷風扇此暮春玄澤墜潤靈爽煙煇高山熾景喬木興繁蘭波清踴芳澣增涼感物興想念我懷人

習習谷風載穆其音流瑩鼓物清塵拂林霖雨嘉播有滄淒陰歸鴻逝矣玄鳥來吟嗟我懷人其居樂潛明發有想如結予心  
習習谷風以溫以涼玄黃交泰品物含章潛介淵躍候鳥雲翔嗟我懷人在津之梁明發有思凌彼褰裳

習習谷風其集惟高嗟我懷人於焉逍遙鸞栖高岡耳想雲韶拊翼墜夕和鳴興朝我之思之言懷其休其符其慕爾歸於人於谷之四澗實



習習谷風其音孔嘉所謂伊人在谷之阿虎質  
山嘯龍輝淵蟠維南有箕匪休其和有球斯畢  
戢爾滂沱懿厥河漢惟彼大華明發有懷我勞  
如何

鄭荅

鴛鴦美賢也有賢者二人雙飛東岳揚輝上京  
其兄已顯登得朝而弟中漸婆娑衡門然其勞  
謙接士吐握待賢雖姬公之下白屋洙泗之養  
三千無以過也乃肯垂顧惠我好音思樂結永  
好之權云爾

鴛鴦于飛在江之涘和音反暢拊翼雙起朝遊  
蘭池夕宿蘭芷清風翕習扇彼蘭茝凌雲高厲  
載翔載止

鴛鴦于飛載飛載吟有鬱浚藪實惟桂林芳條



高茂華繁垂陰爰翔爰翔爰憇其南有馥清芬  
協我好音

鴛鴦于飛乘雲高翔有嚶其友戢翼未翔澹淡  
素波容與趨偕雖曰戢止和音遠揚我有好爵  
與子偕嘗

鴛鴦于飛徘徊翩翩載頽載頽命侶鳴群有鬱  
蘭臯列彼清源駕言遊之聊樂我云思與佳人

齊懽順川

鴛鴦于飛或飛或遊習習谷風扇彼清流春艸  
揚翹黿龜沉浮感物興想我心長憂誰謂河廣  
曾不容舟企予望之搔首踟躕

鴛鴦于飛載和其鳴懷爾好音寡我中情人亦  
有言心得遺形授我木瓜報爾瑤瓊匪絜日報  
永好千齡



陸贈

鳴鶴美君子也太平之世君子猶有退而窮居者樂天知命無憂無欲碩人之考槃傷有德之遺世故作是詩也

鳴鶴在陰戢其左翼肅雍和鳴在川之側假樂君子詐爾明德思樂重虛歸于其極嗟我懷人惟馨黍稷

鳴鶴在陰其鳴喈喈垂翼蘭沼濯清芳池假樂君子其茂猗猗底之瑰寶有粲瓊瓌乃振褰裳襲爾好衣嗟我懷人啟襟以晞

鳴鶴在陰其儀藹藹謂天蓋高和音於邁假樂君子篤膺俊乂穆風潛烈興雲戢蒼德茂當年時衍嘉會安得鞶藻改爾縞帶嗟我懷人心焉忼懷



鳴鶴在陰載好其聲漸陸儀羽遵渚回涇假樂  
君子祚之篤生德耀有穆如瑤如瓊安得風帆  
深濯髴滅景遺雲雨爾在北冥嗟我懷人惟用  
傷情

鄭荅

蘭林懽至好也有君子世濟其美英名光茂遭  
時暫否福德衡門顧我慙慙屢辱德音思與結

好以永不刊  
瞻彼蘭林有翹有秀有斐君子邦之碩茂厥德  
伊何固天攸授如川之源如山之富回流清淵  
啟襟開裕縉紳晞風民用胥附  
猗猗碩人如玉如金浚其明哲剋廣德心習習  
凱風吹我棘林飛鶚萃至允懷好音悠悠征徒  
輞德鮮任嗟我猗人和樂實忱



在昔延州鵠鳴江涯今我陸子曠世繼竒身  
千載德音竝馳漸鴻遵渚宛其羽儀安得高風  
騰翮天池

飛龍蜿蜒山谷升氣猛虎嘯吟清風高厲情同  
來感數垂身逃夷鮑齊懽專名故世愷悌君子  
民之攸憇咨予遘時千載同愛  
垂龔之會匪詩不宣嗟我懷人斯恩斯勤德音  
來訊有蔚其文菽菽憺兔匪迹不存誠在心德  
愛結忘言

陸贈

南衡美君子也言君子遯世不悶以德存身作  
者思其以德來仕又願言就之宿感白駒之義  
而作是詩焉  
南衡惟岳峻極昊蒼瞻彼江湘惟水泱泱清和



有合俊乂以藏天保定爾茂以瓊光景秀濛汜  
穎逸扶桑我之懷矣休音俊揚

穆穆休音有來爾雍沉波涌奧淵芳馥風僚虛  
養恬照日遺蹤考槃遵渚思樂潛龍我之懷矣  
冥爾華宮

和璧在山荆林玉潤之子于潛清輝遠振克稱  
輶德作寶有晉和聲在林羽儀未變我之懷矣

有客來信

風雲有作應通山淵清琴啟彈宮商乘絃類族  
知感有命自天夷叔希世猶謂比肩矧我與子

姤會斯年

我之懷矣在彼北林北林何有於煥斯文瓊瑰  
非寶尺牘成珍豐華非妙得意惟神河魴登俎  
遺荅清川



鄭荅

南山酬至德也有退仕衡門修道以養和棄物  
以存神民思其治士懷其德或思置之列位或  
思從之信宿詩人嘉與此賢當年相遇又屢獲  
德音情懽心至故作是詩焉

陟彼南山言采其蕭樂只君子邦家之翹克茂  
厥猶輜德是收聊道以儉廣愛以周嗟我懷人

永好千秋

瞻彼江潭言釣其鱖有美碩人自公遐處羔裘  
逍遙輜德是舉白駒遯時世事孰與思我猗人  
寘之晉序有客信信獨寐寤語

天高地卑玄黃煙煨人道交泰自昔先民耽文  
合好輔德與仁管叔罕僑曠世難鄰修組施結  
玄弁生塵咨我與子遘會當身琴瑟在御永愛



纏綿

瞻彼江澳言詠其潭所謂伊人在水之陰養和  
以泰樂道之潛錦衣尚綢至樂是耽興言永思  
繫懷所欽愛而不見獨寐寤吟

詩以言志先民是經乃惠嘉訊德音惟馨欽詠  
繁藻永結中情華文傷實世士所營達人神化  
反之混冥交棄其數言取其誠思與哲人獨寶

其貞

陸贈

瞻彼高崗有猗其桐允也君子實寶南江員規  
啟俗沉矩履方泳此明流清瀾川通陟彼衡林  
味其回芳  
馥馥回芳綢繆中原祁祁庶類薄采其芬栖遲  
泌丘容與衡門聲播東汜響溢南雲



穆穆閭闔南端啟籥庶明以庸帝聽式闕有鳳  
于潜在林栖翮非予之祚孰與好爵  
幽居玩物顧景自願發憤潜惟仞佛有思予美  
忘此終然胥來企予與言惟用作詩

鄭荅

瞻彼中陵蘭黃猗猗允矣君子樂且有儀沉仁  
育物玄聰鏡機德克闡庭名逸南畿祁祁俊友

言酌言依

鼓鐘於宮百里震聲亶亶令問歸我偉貞厥震  
伊何駿奔以驚厥問伊何民胥以寧有鶴在陰  
非子誰鳴我有好爵非子孰盈

潜龍遁初有鳳戢翬王猶未泰彛倫錯違臯門  
重爾啟扉庶績適敷非爾焉綏翼翼京宇

俟爾攸晞民之胥望如渴如飢



德音來惠覆玩三周沉潤淵洞逸藻雲浮結心  
所親曷變曷渝路隔津梁一筆限殊終朝之思  
三秋是踰愛而不見與言踟蹰

陸士龍集卷之三

終

陸士龍文集卷四目錄

詩

贈顧尚書一首

贈顧彥先一首

畬顧秀才一首

畬大將軍祭酒顧令文一首

畬吳王上將軍顧處微一首

贈鄱陽府張仲鷹一首



孫顯世贈并畬 失題二首

畬兄平原二首 為顧彥先贈婦四首

畬張士然一首 芙蓉一首

嘯一首

陸士龍文集卷四目錄終

陸士龍文集卷之四

晉 陸士龍著

明 徐日曦闡仲閱

詩

贈顧尚書一首

五嶽降神四瀆炳靈兩儀鈞陶參和大成兆光  
人倫誕育至英於顯尚書實惟我兄行成世則



才爲時生體道旣弘大德允明厥弘伊何靡曠  
不遵厥明伊何靡妙不研無索炤灼有冰幽玄  
細微不錯毫芒以陳積篲爲山納流成淵扶翹  
布華養物作春所肅以禮所潤以仁宣質拔行  
曜文入采堅不可鑽清如凝水方迹迎服蹈齊  
闕里晞聖而惟亦顧之子彼棄芝英玩此蘭茝  
異世同芳其馥不已我蘭旣馥我風載清能芬

南岳運芳北征子有其德人求其馨逝此陋巷  
薰彼紫庭厥音不已鼓鐘有聲聞天之聰譬之  
鵠鳴天聰旣招我實惟彰乘風之鳳眷言朝陽  
披雲藻綉來此舊鄉謙光自抑厥輝愈揚麗容  
魁翕孔好已張旣照平林且我萃英萃英已曜  
餘光難延會淺別速哀以紹欣追曠同塗暫和  
笑言殊音合奏曲異響連絕我懽條統我思因



根分來在愛感往思我非形景有處有遊載離  
載會且懽且憂感彼遠曠爰此延娛樂奏聲哀  
言發涕流唯願我子德與福俱亦天之祐亦我  
之

贈顧彥先

八章

玄黃挺秀誕授至真行該其高德備其新光瑩  
之偉隋卞同珍騰都之龍鳳合塵

皇皇明哲應期繼聲華映殊域實鎮天庭入輔  
出輔乾乾靡寧夏發涼臺我雨我暑冬違邦族  
風霜是處嗟彼獨宿誰與晤語飄飄艱辛非禹  
孰舉言念君子悵惟心楚

悠悠山川驍驍征遐陟升焦堯降涉洪波言無  
不利乘嶮而嘉人懷思慮我保其和  
邂逅相遇良願乃從不逢知己誰濟予躬莫攀



莫附媿我高風時過年邁掩冉桑榆晞光賴潤  
亦在斯須假我夷塗頓不忘驅汜予津川桴不  
失浮無愛餘輝遂暗東嶠

幽幽東嶠戀彼西歸瞻儀情感聆音心悲之子  
於邁夙夜京畿王事多難仲焉徘徊疑幸未再

畚顧秀才

五章

芒芒上玄有物有則厥初造命立我藝則爰茲

族類有覺先識斯文未喪誕育明德其效必聞  
允矣顧生載靈之和沉根芳沼濯秀蘭波淵翹  
戟穎景茂凌華惟是德心是用閑邪之基  
德心伊何行歸於周晞高仰峻企遠懷悠匪願  
在明靡倦斯幽凡我同朋瞻言清休

慎終於遠俾民歸厚言若有行及予携手何以

恤

一作

我其仁孔有心之云愛隆敬其久



既邁斯仁亦迪茲文藻不雕樸華不變淳有斐  
君子如珪如璠仰欽德類依懷惠詮式揚好問  
邦家於宣

荅大將軍祭酒顧令文

惟林有鸞惟淵有螭顯允明德實邦之基先后  
陟恪子配於茲遵彼玉堂受言遘之  
中原有軌世鮮克蹈先民有懷子探其妙心猶

水鑿函景內照名若振炎攄光外耀

相彼水鑿民胥攸臨矧曰明德人誰弗欽寫我  
朶頤卽爾澄心義隆自古好邈在今

大人有祚興雲自天之子於升亦躍於淵景曳  
清霄響發鳴弦義問弘集淑風載鮮

企予朔都非子孰念豈無弱翰才不克瞻惠音  
聿來瓊華玉艷無德不報念辭惟忝



荅吳王上將顧處微

邈矣大昧造化明明物以曲全人以直生類聚  
百族群分萬形員淵挺隨方川吐瓊

藹藹洪族天祿攸蕃神綏厥本道裕其源條有  
豐葉波無輟瀾烈風時播芳響世繁

曰繁曰熙載德於茲克文克敏乃惠乃慈遵彼  
洪流薄言詠之好是神契聊與之期

仁勇同宅文武相紛王謂御事誰撫上軍於時  
翻飛虎嘯江濱式遏不虞俾也無塵

三代旣遠直道垂音非齒焉尚非德孰欽鑽仰  
自古鮮曰在今匪唯形交殷薦其心  
心以殷薦分以道成祗服惠顧疇此深情亦有

芳訊薄載其誠豈無春暉茲焉可榮  
大道易聞崇軌難襲孰云匪衍咎矣尤集敢謝



不佞栖山自戢臨篇焉愧德輶辭輯大梁頌騰  
翩彼日月逝猶駭電朝華未厭夕風已扇詩亦  
有悲無幾相見懷德歎心於焉東眷  
平津晚貢貢公後徵陟彼玉階黃髮來升靈卉  
三秀芳草秋興唯願清神福祿是膺

贈鄱陽府君張仲膺

神林何有竒華妙實皇朝如何寤文極質斌斌  
君子升堂入室太上有曜子誕其輝知機日難  
子達其微入輔幃幄出御千里滔滔江漢南國  
之紀

謁帝東堂剖符南征天子命我車服以榮何以  
潤之德被蒼生何以濟之威振群城却愚以化  
崇賢以仁鳳舒其翮龍濯其鱗憶彼荒藪莫敢  
不賓雖云舊邦其命惟新



卞和南金終始一色顯允君子窮達一德弘仁  
厲道物究其極古賢受爵循墻虎恭今哲居貴  
履盈如冲接新以化愛舊以豐隆此嚶鳴惇彼  
谷風  
忠至寵加孝至榮集內崇南芬外清名邑煒煒  
棠棣夙增其萃猗猗桑梓厥耀孔多被繡畫行  
昔人攸美階雲飛藻孰與同粲  
人道伊何難合易離會如升峻別如順淇嗟我  
懷人曷云其來貢言執手涕旣隕之

孫顯世贈

五龍戢號雲鳥纂紀淳化旣離義風肅始軒冕  
垂容文教乃理奕奕英族盛德豐祀

於赫皇吳應天統元蒸文烈公光讚懿勲九命  
重輝恭德彌勤萃黻襲藻金石載振



淵哉陸生本顯洪胄亦崇懿風邈比弘裕無兢  
惟德豐光伊茂文以義好施以仁富  
山積惟峻道隆名遐潛景在淵龍躍承華旣升  
爾儀誰不允嘉有濯重深載清其波  
濟濟皇朝峨峨髦士序爵以賢惟俊萃止翩翩  
二官令問不已乃遷華閣皇典斯紀

思文大謨恢我王猷清風肆穆雅憲允休邁彼

江川邈此北流微言蘭馥玉藻雲浮

遭時之險虎宰滔天憑德美重繫此俊賢休否

旣亨名以德淵清微伊鑠鑠之彌堅

明明大象玄鑒照微顯允君子求福不回善挹  
引慶險以德祈澄濁以靜岡久不暉

釋彼遊寄樂此窈貞形以神和思以道新清雲  
方乘芳餌可捐達觀在一萬物自賓



重門誰和子音瞻彼晨風思託茂林

答

邈矣上祖垂休萬葉廣問弘被崇軌峻躡高山  
克荒大川利涉繁藹惟祐風連雲接

大人有作二后利見九功敷奏七德殷薦萬實  
重芳勞烈再扇奕世弘道天祿來宴

道弘振古祚未替今如彼在川亦有浮沉  
既素響非我音豈曰荒止塗弗克尋

昌風改物豐水易瀾百川總紀四海合源在彼

焉取聿來莫觀曾是徧心敢忘丘園  
員暉偏照玄澤謬盈發彼承華頓此增城記景

靈雲倦遊紫庭匪曰能知寔忝長嬰

煥矣金虎襲我皇猷孰云匪去仰媿蒼流往蹇

來反弭迹一丘變彼東朝言即爾謀



振振孫子洪族之紀志擬龍潛德配麟趾引服  
朗節克明峻軌遵彼中臯於穆不已蒼流掛  
於穆不已大都是階之子于命民應如墮厚德  
時邁協風允諸惠此海湄俾也可懷  
乃眷北林樂哉河曲解紱披褐接即懷玉遺情  
春臺託陰寒木言念伊人溫其在谷  
道俟人行辭以義輯和容過表余未云執惠音

弘播清風駿集懷德形撫臨篇景立

失題二首

美哉良友稟德坤靈明照遠鑒幽微研精超跡  
皇英質如瑤瓊贈我翰林示我丹誠道同契合  
體異心并自頃西徂合於五樓遲想歡嫌觀我  
良疇亦旣至止願言莫繇室邇入鬲中情則憂  
抱恨東遊神徃形畱何以合忍寄之此詩何以



寫思記之斯辭我心愛矣歌以贈之無祕爾音  
不我是貽有美人人芳問芬葩嗟我欽美夢想  
光華亦旣至思上下欣嘉德馥秋蘭容茂春羅  
淑似令娣惟予陋何雖有良友朽木難加愛樂  
朋規贈以斯歌皆能載之其美孔多嗟痛薄祐  
竝罹哀苦堂構旣崩過庭莫覩我悴西隣子沉  
東土契闊艱辛誰與晤語身滯情往神逝影處  
覆夢宵寐以慰延佇

荅兄平原二首

以下俱  
五言

悠悠塗可極別促怨會長銜思戀行邁興言在  
臨觴南津有絕濟北渚無河梁神往同逝感形  
留悲參商衡軌若殊迹牽牛非服箱  
行矣怨路長怒焉傷別促指途悲有餘臨觴歡  
不足我若西流水子如東峙嶽慷慨逝言感徘徊



徊居情育安行携手俱契闊成腓服

爲顧彥先贈婦四首

我在三川陽子居五湖陰山海一何曠譬彼飛  
與沉目想清慧姿耳存淑媚音獨寐多遠念寤  
言撫空矜彼美同懷子非爾誰爲心

悠悠君行邁犖犖妾獨止山河安可踰永路隔  
萬里京室多妖冶粲粲都人子雅步擢纖腰巧

笑發皓齒佳麗良可美衰賤焉足紀遠蒙眷顧  
言銜恩非望始翩翩飛蓬止郁郁寒水縈遊止  
固殊性浮沉豈一情隆愛結在昔信誓貫三靈  
秉心金石固豈從時俗傾美目逝不顧纖腰徒  
盈盈何用結中欵仰指北辰星浮海難爲水游  
林難爲觀容色貴及時朝華忘日晏皎皎彼姝  
子灼灼懷春粲西城善雅舞總章饒清彈鳴簧



發丹唇朱絃繞素腕輕裾猶電揮雙袂如霧散  
華容溢藻幄哀音入雲漢知音世所希非君誰  
能讚棄置北辰星問此玄龍煥時暮復何言華  
落理必賤

荅張士然一首

行邁越長川飄飄冒風塵通波激江渚悲風薄  
丘榛修路無窮迹井邑自相循百城各異俗千

室非良隣歡舊難假合風土豈虛親感念桑梓  
域髣髴眼中人靡靡日夜遠眷眷懷苦辛

芙蓉

綠房含青實金條懸白璆俯仰隨風傾煒燁照  
清流

嘯

逍遙近南畔長嘯作悲歎



陸士龍文集卷之四

終

陸士龍文集卷五目錄

誄

吳故丞相陸公誄

晉故散騎常侍陸府君誄

晉故豫章內史夏府君誄



陸士龍文集卷之五

晉陸雲士龍著

明徐日曦閣仲閱亦天

誄

吳故丞相陸公誄

惟赤烏八年二月粵乙卯吳故使持節郢州牧  
左都護丞相江陵郡侯陸公薨嗚呼哀哉皇朝



迭紹成命昊天聖王作矣世有哲臣觀監在吳  
乃降斯神思皇我后應暉對揚穎秀崇華景逸  
扶桑龍輝襲極鳳鳴玉堂舉旗清阻奮鉞夷荒  
悠結沉維峻極公綱將撫遠績括地九圍皇淳  
爽泰昊旻疾威生民如何哲人其頽登靈在天  
遺音播徽敢揚元勲表之素旂乃作誄曰

濬哲我祖時文峻德玄粹納真清休載式本承

慶輝駿惠罔極申錫多祐本支千億芳條遠蔭  
靈根茂植根條伊何苗黃裔舜長發有祥貽我  
祚晉神明之緒實蕃瑰雋和音嗣世不替碩彥  
明鑒在下降命上玄我公初載天嘏之純重光  
納照旋璣授銓仰儀喬嶽俯濯洪川清輝秀穎  
雲翹映晨肇彼岐嶷允迪天真先心則智率意  
斯仁秉夷清昧體靈協神神休載鑠九德兼和



挹揮茂朴豐淳鎮華景峻凌高玄源踴波造辰  
竦隆彌海廓遐光備旣淳逸軌爰超閎罔苞荒  
景靈渥耀山林嶽秀天光乃照窮化機神探蹟  
衆妙駭塵氛埃澄響清肖恢淵博量騰嶮峻邵  
振綱宇表登軌絕蹈厥初藏噐栖蟠海嶽披藻  
崑崙濯秀暘谷沉輝熙茂清塵熠鑠含章在淵  
發揮龍躍時復陽九承乾之衰有皇於井玉軒

徘徊爰茲赫奕需期雲飛天步皇輿載見太微  
華堂誕基委蛇自階鼎輝旣濟嘉命乃集和美  
未嘗宰物下邑康年委登惠風時協在斷無頗  
於教斯輯金虎覲精戎車孔肆神寶播越天人  
釋位有命在茲帝思元帥委弁總干振翼虎噬  
威靈旣授六軍有序乃誓我衆乃整我旅神干  
山立雄旗電舉懸旌汜陽即戎江滸我后日敬



上帝臨予靖端夙夜匪寧匪處經始綿綿滂沱  
惟海乃幹中軍入作內輔公侯陟降在帝左右  
關羽滔天作雲西土帝曰將軍整爾熊虎赫赫  
明明皇輿出祖龍舟照淵旟旒映野鋪敦江濱  
仍執醜虜荆南旣集方嶮未夷天子命我撫之  
西垂公侯戾止威神緝熙虔劉作虐思輯于來  
妖於北靡舉爾雄旗獷狘羣蠻邠邠遺黎柔遠

能和薄言綏之方堦肅清烈文雋武舍爵明堂  
冊勲天府天子曰咨我圖乃功錫爾青土建侯  
於東開國名墟光宅海邦分圭作寶軒輅以庸  
旣受帝祐公用如大四鐵孔阜元戎沓藹淑旂  
飛藻綏章丞蓋振我輝靈四方於邁劉王負嶮  
寇我西隣公侯赫怒干戈啟陳金鉞鏡日雲旗  
絳天凌岡襄嶽沉維括淵元王隕難鯨鯢墜鱗



戎漢時殪方域清塵曹休東踰我疆斯越帝簡  
厥佐將命其傑乃俾我公啟行警伐江漢之滸  
恭授鉞揖帝整旅隱爾霆發栢栢神誅震驚  
魏方我公矯矯虎視元戎截彼醜旅效此武功  
武功旣彰天威薄曜靈武震華邊垂清暴振旅  
凱入王假有廟假廟伊何本庸寵祚土田陪敦  
四牡載路出餞于郊此惟予顧禮嘉嵩高樂和  
湛露改容肅至傾蓋寵步鞶帶翩紛珍裘阿那  
區宇惟寧繁遏帝祉於穆疇咨敷奏多士將庸  
元輔相惟天子僉曰公侯宜有爰止繡裳縟藻  
袞帶重紫遂虛上司命公登宰帝曰丞相朕嘉  
君德以茲軒冕往踐乃職宣爾獻心維黃協  
極邦國若否四方爾式公拜稽首欽翼明聖乃  
御機衡仰徽七政祗恪本顯無易惟命巍巍天



邑惟清四門公侯作弼煥炳皇文重輝熾景協  
風煙煜百神秩祀兆獻思淳克諧庶尹遂成帝  
勲時雍旣濟王途克廣儀形我度軌物垂象後  
遐施歸崇蔭惠仰茂德栖音廣問沉響洪範遠  
迪玄猷洞深靈澤崇藪天嶮垂陰翰飛樂嶮淵  
蟠泳沉澤豐泉丘潤博雲林遭世大過彝倫靡  
肅豐豐公侯思維雅俗發憤戎衣永言禮樂被  
分敦化荷戈思學體仁長物御風熙國敎鑿擢  
微玄輝鏡璞戒危膏梁收後白屋五品時訓民  
神攸鑠我有英文如曜如辰何以崇之匪闡伊  
人我有烈武如震如霆何以將之保大豐年思  
弘景業熙世登民克壯碩老秉鉞河津祉祚勿  
引早世幽神仰慕遺輝寤辟憂殷嗚呼哀哉永  
惟我公克明德心紛藹芳和被之惠林公侯沒



矣孰嗣徽音名存體逝德茂形潛民之秉思好  
是嘔吟嗚呼哀哉惟帝念功寵命光大考謚典  
謨崇榮協泰安宮載考我公於邁輻軒啟塗先  
驅驚旆哀風結輿遺思馮蓋舍此休明卽彼重  
藹攀慕靡及永戀光愛嗚呼哀哉

晉故散騎常侍陸府君誄

惟太康五年夏四月丙申晉故散騎常侍吳郡

陸君卒嗚呼哀哉天降純嘏誕育俊乂才  
奧德鍾三懿應運繼期顯微闡昧特恢大猷雍  
化熙世昊天不吊奄忽零墜嗚呼哀哉朝隕棠  
榦邦喪國輝帝欽遺烈士詠清機思經皇心痛  
浹民懷揮淚克邑惜慟盈畿敢述洪迹於茲素  
旂其辭曰

於穆皇源時惟誕弘權與有媯爰帝暨王徽音



接響丕祚克昌乾鑿南眷誕降我祖顯考尚書  
納言帝宇正命惟允銓衡攸序篤生常侍因天  
所隆祚以靈粹陶以惠風道協體稟德與性鍾  
叡心遠暢淵思遐通瞻言潛覽克哲克聰耽精  
遐奧肆志篇章仰咨遺訓思齊曩蹤擒光丞晦  
微言是綱錯綜羣藝精徹豪芒顯允閑姿旣明  
且緯敦叙汜愛經德紀義契闊邦族是綜是緯  
博約以禮陳錫載施雍雍閨闈克諧繇仁率禮  
崇化也養寧親九族和睦德被宗姻猗猗髦俊  
祁祁縉紳鑽仰明範挹道希塵愷悌弘裕惠化  
是振潛機密暢靡幽不甄濯以清波權以明鈐  
旌善板築刊穢紫辰邦無媿幸靈不牟員沐浴  
玄源風移俗純儀德鄒甸北化泗濱耀畧切輝  
旣升末融爰益揚邑作尹名邦審通帝畿大東



小東宣敷五教敝化以崇徵無墜命興無廢功  
帝欽良政民懷穆風粵稽舊章率繇典刑考績  
三載紬幽陟明超踐皇闈紆組垂纓奕世納言  
帝衡以平本崇曩烈堂構克榮征輦屢振干戈  
未戢乃秉雄戟徵戎東邑四牡徂征威德以立  
爰守會稽青紱旣襲帝曰欽哉疇咨群后改授  
以服屯騎是撫雍容皇甸綜文經武時值太過  
士爽其德虔惟常侍高明柔直履冰察霜淪心  
遠測春存三季形志於色頻顛厄運載離咎慝  
靖亨思順曹氏匪革投弁釋紱皓恩東嶽遁世  
無悶清源是濯馥風彌馨明徽載鑠皇途旣闢  
天網誕張運在九五違嶮即康猗歟高懿避風  
遠臧帝降大命丘園是揚裸將天邑舒藻舊京  
僉曰休哉昭德塞違乃升常伯補闕拾遺振纓



紫極攄光大微奕奕玄冕熠熠貂璫仰耀皇維  
俯映明堂輿振鳴鸞體佩琮璜居德彌冲雖休  
匪康旣跚君宿未踣鼎辰將陟太階弘載育民  
皇靈靡顧大命奄臻厲凶彌留儵忽頽湮嗚呼  
哀哉黃河難澄梁木易荒聖賢絕景希世齊光  
豈曰徒生實維天綱於鑠常侍本德昭仁俯鏗  
瑤響仰綴玉振其在克壯自蹇乘屯鳳翳靈條  
龍竄祕泉收逋匿耀洪畧陶緼雖跚嘉運託景  
風雲瑰光旣耀靈寶未闡弗慮皇圖銜恨徂遷  
嗚呼哀哉江河慕海丘陵樂山於惟君德齊聖  
廣淵群彥景附漸化濯真益以崇嚴函以裕淵  
西徂華源負澤慕塵幽萌潛暢滯思賴振六言  
六行匪君不肅五有三無匪君不極衡准失平  
匪君不直方榮遐邈匪君不式君其永沒民其



焉則結思遺愛惟哀允惻嗚呼哀哉仲尼喪魯  
孺慕失聲國僑殞鄭邦無竽笙實惟常侍徽懿  
克明恩懷士心信結民情聞者巷泣赴者風征  
八音輟響獻酢弗營羽檄翳川輕駕盈庭揮袂  
雲藹殞淚雨零嗚呼哀哉伊惟平生襲寵荷輝  
愷樂承明采梓猶哀聿懷震丘言告言歸明德  
遠燭慮凶以吉雖則榮泰存亡是卹爰築新邑

經始匪日眷懷不虞寧觀斯室王事靡盬皇畿  
是旋鳴和吉往曾未浹辰震旆凶歸輝景長泯  
痛感皇祇哀普四民嗚呼哀哉穆穆天子昭明  
有融乃命三人禮憲是崇賜以疇賻榮以贈終  
冠蓋南徂映族輝邦日薄南陸辰次天漢龜筮  
協貞靈域載判明器旣庇神道已羨縣象未登  
明星有爛軒車微動執紼同贊永棄高厦黃廬



是館寧彼昏昧荒此輝粲幽房長鍵脩夜靡旦  
翼翼輕蓋翩翩丹旂龍章舒藻旗旒有輝轡輪  
轆結玄駟徘徊人誰弗思靡思匪哀援扎心楚  
投翰餘悲嗚呼哀哉

晉故豫章內史夏府君誄

惟永寧元年五月二十五日晉故豫章內史夏  
府君卒嗚呼哀哉乾鑿育俊崇茲大猷景靈垂

祐黃精協符濯蹤浩素闡志玄流熙光聖代邁  
勲九區哀彼造物殂命不均旣褒斯美茲遐  
年邗邗摺紳泣涕流連故作斯誄著之不泯其

辭曰

於穆府君遠祖彌光功濟黎獻澤洽八荒披圖  
承禪襲化軒唐洪風旣振遐耀休煌越殷自周  
紹膺遺祉亮節三恪侯服于祀悠悠訖茲徽烈



不已奕世本弘厥美是紀惟神隆慶篤生府君  
玄祐秀朗揮景烟煜誕載豐美俊穎夙繁性與  
體和孝友穆融虔茲君親姻族睦崇情廣褻誘  
品物虛躬安仁履素接舊以冲澄鑒博映哲思  
惟文淪心衆妙洞志靈源探幽判疑沉欲焱分  
甄滯群秘義猶一貫崇規邈世體道而盤瞻言  
先機蔚藻騰翰處約繇厚交順於顏文武未墜

君惟克修百行殊揆君望斯周栖義初九戢翼  
洪條瓊輝四灼景問綢繆在昔我國元首載哲  
假寐俟旦思庸俊逸旃簡高麾體亦秩秩儀刑  
柳惠庶績惟穆旣穆其績英風彌邵天子有命  
曾是在朝頻繁幃幄祗承皇曜神以測幽明以  
遠照目難識夷觀嶮改蹈譬彼清鑒莫塵其操  
五紀迭御載隆載傾南嶽頽鎮蔭輝素靈瑾瑜



遷寶投跡上京兆萌未緝皇聖攸嗟韋臨猗氏  
接被郇瑕道之以禮育之以和齊俗拯弊民靡  
不嘉振我翰音洋鑠諸華明明皇儲叡哲時招  
奮厥河澣矯足雲霄俄軒玄闕徽英揚颺光灼  
東朝髦士攸希媚茲一人示旣翰飛委蛇華閣  
陟降太微納言贊事淵裕徘徊習習和風惟穆  
惟宣亦曰武昌厥俗允新我後有命爰授俊臣

君子云顧義在安親秉文共武言撫舊京仰肅  
慈顏俯熙典刑移彼滯汙泮宮時營衆否斯濟  
飛鴉革聲春翹晞景振鷺在庭高墉未奮遭茲  
閔凶頻顛泣血三載以終哀響未欲臺命朝隆  
厥命伊何俾守南裔匪曰是屯茶託身虛槩巾  
車旣脂駕言將逝彛倫惟清路逼其序君之于  
遠乃恢斯緒思彼衆逸言尋厥楚暮瞻豐林晨



看淵水濯竒以翹披途導軌彼湘之東地嶮俗  
危明德審罰替幽崇儀嚴不式刑仁扶物施威  
和咸振澤被遐畿皇道御世與民靡偏改彼惠  
政濟此未均思一黔首濯漑義淵揖望皇命修  
翻徊翔循彼江濱乃眷豫章觀風樹政德音允  
張洪化旣攄禮樂克昌閑非秋厲惠淑春陽廣  
命俊又惟弓與旃丘園靡滯鸞驥憑軒豈方伊

類捉髮躬勤震我聲教邁嚮惟殷君化大揚自  
北而南君澤本沃河漢載咸慶輝雲蔭溼潤川  
漸將配皇宿登景具瞻昊天不弔乃降茲厲高  
祿朱融凶焱中燧寢疾彌留大命隕墜邦家不  
紀沉哀結世嗚呼哀哉式玩遺美君實克明懷  
光暢幽晞髮結清體德秉真審行居貞屈曳路  
機與世靡矜天命棗謚唯仁則延任道委分亮



曰斯然孰云府君不聞其言永懷載念憂心孔  
艱曰兄曰弟篤愛纏綿晞光繼軌參融鴻振今  
君何之背世遐湮同生拊膺號哀瘁身眇眇孤  
微過庭曷遵天何忍斯于何之臻自君初邁旣  
夷且榮今君反矣素旗垂銘雖光百辟託畧玄  
靈民慟于顯神孤于冥物從人感轅馬失征飄  
風悼響潛魚仰驚豐霄蹙蔭衆羽徊嗚嗚呼哀  
哉瞻彼日月歲聿云夕寒暑窮化四辰文錯日  
考三從案轡長薄藹矣輻軒脫駕窀穸背榮孤  
世寧神大漢丘陵竦廕閨闈寥宰寤標惟哀心  
摧涕激嗚呼哀哉咨予與君恩親之微蒙恤于  
昔投纓瀾猗思周弱志永庇惠輝如何府君昭  
景長違願言詠眷載傷載悲昔我經年逝彼川  
路進闕初奔退違陵墓仰瞻靈丘俯增永慕惻



剝肝懷哀其曷厝嗚呼哀哉

陸士龍文集卷之五 終

陸士龍文集卷六目錄

頌  
讚  
嘲

登遐頌

盛德頌

祖考頌

張二侯頌

榮啟期讚

嘲褚常侍

牛責季友



陸士龍文集卷之六

陸雲士龍著

小英明人徐日曦闡仲閱文

頌人讚 嘲王子喬

夫之登遐頌何以言齊之變為耶云爾

夫死生存亡二理之已然者也而世有神仙登遐之言千歲不死之壽其詳固難得而精矣列



仙之道作者既集而登遐未有焉莊周有言我  
試妄言之子試妄聽之彼之有無蓋難以理求  
我之妄聽顧可以言寄之遂爲頌云爾

郊間人贊 王子喬 玄洛

孔仲尼 九疑仙人 命曰太勝山上女

李少君 梅福 晉 張招 晉

左元放 文舉 劉根 黃伯嚴

費長房 何女子 焦生

鮮卑務塵 韓衆 夷門子

林陽子 任作子 鬼谷子

淵哉郊間懷寶採薪媚茲伯陽常道是夤俯翼  
遂周携手入秦遺物執一妙世願神思我玄流  
浩若無津

王喬淵嘿遂忘潜輝遺形靈嶽顧景亡歸變彼



有傳與爾翻飛承雲儵忽飄颻紫微

玄洛妙識饑餌神穎在陰儵逝即陽無景逍遙  
北嶽凌霄引領揮霧昊天合神自靖

孔丘大聖配天弘道風扇玄流思探神寶明發  
懷周興言謨老靈魄有行言觀蒼昊清歌先試  
冊書有造

茫茫九疑登暉太素有漢登聞神具爾顧發彼  
靈丘聿來載步貽我則歌永揚遐祚

大勝之娥厥猶翼翼降宮有和納符帝側揮杖  
指辰絕音頽息茗茗玄右在彼峻極

少君善祠怡爾豐顏俯覲劉漢仰接姜栢式宴  
安期巨棗爲餐神光攸往後來其嘆

在漢之衰頽火炎精梅公指景有皇遺形逝彼  
文辭胥此洞庭神輝絕景豈外北冥



張招澄精妙思玄芒則是神物錯綜徽章乃幽  
乃顯若存若亡因形則變倏忽無方

生在清純放情玄昧在物淵沉沂虛攸遂清酒  
一壺百朋具醉有命集止乘龍來萃載見君子  
言觀其蔚

劉根登嵩遺世盤桓形委服容口厭瓊蘭挹彼  
呼翁爲爾朝食景絕巖穴光茂雲端

伯巖志道翻飛自南北食中嶽練形嵩岑奔星  
凌顏朱光垂陰雲精九握耀盈襟

長房有懷承師問道蒙險洪海晞心玄浩將登  
蓬萊祚爾難老嘉命旣錫如何勿考

逝矣何女芳靈旣彫安寢曾丘逝魂清宵喪魄  
載營大墓崇朝玉趾再步於焉逍遙

焦生卜居在河之東皓襟解帶嘉卉結客願神



大素淑思玄冲在彼黃堂明道固窮  
北狄務塵在彼沙漠含神自願靜居有恪自彼  
王庭聿來伊洛天子命之載見紫閣  
韓衆終化靈毛揚葩慎爾貞心神祉來荷  
靡靡夷門體道含真餐茹靈卉凌雲願神  
林陽餌車明視聰耳壯子旣飡步晞千里  
任作凱入輕雲揮止移形善變載坐載起

悠悠鬼谷永言潛止要終有集資生無始綢繆  
方平在彼二子芬響蘭揮有來盈耳

盛德頌

余行經泗水高帝昔爲亭長於此瞻望山川意  
有恨然遂奏章以通情焉并爲之頌云爾

晉太子舍人糞土臣雲稽首再拜上書皇帝陛  
下臣雲頓首死罪伏惟陛下紹軒轅之叡哲越



三代之高蹤膺有聖之玄景詠生民之上畧秦  
政肆虐漸豐生民在昔上帝乃眷多方肅雍寶  
命鑒民顧天思文獻聖以宅神器六合焱駕八  
荒 錯企皇居於阿房倚逸鹿於九野謀猷回  
適天人匪祚乃薊斯國授漢于夜京是以先詔  
五緯章太素神母哀號底命丹野九垓闢授命  
之符鈞天清建皇之鑒陛下螭螭泗水龍躍下

亭慶雲徘徊紫塵熠爍皇威肇於斷蛇神武基  
於豐沛掩四綏以蓋天廓玄謨以闢宇華宮山  
藏玉堂海紬雲蓋景陰金門林蔚拔足崇長揖  
之賓吐食納獻規之客玄猷上通德輝下濟仰  
翰雲禽俯躍魚魴是以四海之內莫不企景嶽  
以接群望廣川而鱗集乘山涉水視險若夷奔  
波闕廷思効死節乃鳴鸞在衡奔驥服輅良平



鳳栖信布虎據豪雄凌暴於外奇謨補闕乎內  
威謀兼陳智勇畢効乃凌河海河海無梁乃仆  
高山嶽華不重三秦席卷項籍灰分逋虜霧散  
遺寇雲徹泛時雨以清天灑狂塵以肅地轡於  
川與竦峻蓋於蒼昊功濟宇宙德被群生天人  
允嘉民神協愛歷數在身有命將集而陛下猶  
復允執高讓成功靡有普天歸德群后固請然  
後謁天皇於圓丘巡萬乘於帝室率土離暴秦  
之亂臣妾蒙有道之惠戎羗蠻夷之虜雕趾肅  
慎之國莫非帝臣巍巍蕩蕩蓋天臨地自啟闢  
以來有皇之美未有若聖功之著盛者也臣雲  
頓首頓首死罪死罪臣以鄙倍文武無施忝寵  
本朝承乏下位而臣邁愍自西徂東行邁攸止  
路經泗水伏見史臣班固撰錄聖功竊承陛下



扶桑始照天暉未融之日嘗臨御此川於是即  
命舟人弭楫水沚瞻仰山川舊物不替永惟聖  
輝罔識所憑遠眺邇全感物興哀終懷靡及俯  
心遐慕臣命違千載之運身生四百之外恨不  
得役力聖明之鑒寓目風塵之會揮戈前隊待  
罪下軍抽鋒咸陽之關提鉞項籍之領痛心自  
悼不知所裁行役之臣牽制朝憲雖懷彷徨王  
事靡盬肅將言邁實銜罔極臣聞遊魂變化神  
道無方雖聖靈登遐降陟在天連光五精流輝  
太一或冀神輿降觀薄猗五服時邁玉輅言巡  
茲邑是以下臣仰瞻紫宮俯要恍惚愚情振蕩  
靡審所如不勝延頸紫微結心闡闔之情謹住  
水濱拜章陳愚臣雲誠惶誠恐頓首頓首死罪  
死罪臣稽首以聞臣雲言臣聞歌詠所以宣成



功之烈詩頌所以美盛德之容是以聞其聲則  
重華之道彌新存其操則文王之容可覩永惟  
陛下聖德豐化比隆前代元勳茂功超蹤在昔  
故詩歌之所依詠金石之所揄揚者也臣謹上  
盛德頌一篇雖不足以仰度天高伏測地厚貴  
獻狂夫區區之情臣雲云晉太子舍人臣陸  
雲上於皇漢祖纂胄有唐平章在昔文思百王

丹輝栖列火精幽光爰茲聖緒頽維弛綱靈曜  
熠爍躋景扶桑則天未墜重規旻蒼其規伊何  
橫乾作峻厥德不圯矩地能順憑河拓景襄岳  
殷韻龍章景偉虎質碩變有秦不競罔極黔首  
震驚予師思虔神主上帝曰咨天鑒有赫乃眷  
伊漢此惟予宅明明聖皇旣受帝祉雲騰下邑  
風駭泗水仰鏡天文五緯同晷俯察雲符神母



爰止思文聖王克廣克遐威凌群桀德潤諸華  
爰祀天人天人攸嘉爰輯蒸徒所和旣和旣和  
旣順乃矢德音豐沛之旅其會如林朱旗虹超  
彤旆電尋推師蕭曹撫劔高吟元戎薄伐時罔  
不龕凌波川潰肆野陸沉咸陽克殄旣係秦后  
峩峩阿房乃清帝宇穆穆聖皇天保攸定有項  
畔換不式王命旣愆黜我西土於鑠王師遵時  
匪怒爰赫乘豐席卷三夏嘽嘽戎軒矯矯乘馬  
爨伐強楚至于垓下天誅薄曜暴籍授首區夏  
旣混宇宙蒙又肅肅帝居巍巍神器有皇于登  
是臨天位綉文于裳組華于黻明明天子有穆  
其容至止鏘鏘相惟辟公宣聲路寢發號紫宮  
頒此愷悌以畜萬邦思樂皇慶協于時雍琴瑟  
在御大予舞功越裳委贄肅慎來王明明聖皇



闡國乘制分圭昨勞河山命誓禮律克彰典文  
垂藝有漢恢恢疏罔不替聖功克明九方孔安  
良宰內幹武臣外閑漸澤冀域沾被戎蠻連光  
太素萬載不刊

祖考頌

雲之世族承黃虞之苗緒裔靈根之遺芳用能  
枝播千條穎振萬葉繁衍固於三代饗祀存乎

百世豈非皇慶之積祐神明之殷祥者哉在周  
之衰有媯之後將育于姜而貞龜發鳴鳳之兆  
周史表觀國之繇故能光宇營丘奄有東海支  
庶蕃廡而胤祚昌大矣遭世多難子孫蕩析逐  
于南土烈祖丞相邵侯顯考大司馬武侯明德  
叡哲姿雄特秀固上天所以繼跡前期惠成顧  
者也是以有吳雲興而邵侯龍見遂風騰海堦



電斷荆楚運籌制勝底定經畧文德光宣武功  
四克乃作台衡以御于王政天罔與先代比隆  
義問與前修接響固所謂汪汪浩浩不世出者  
哉武侯以光遠之度襲重規之範宣朗之明照  
曾暉之景故寅亮樞極則萬物淳曜緝熙有邦  
而宇內恪居及至中葉亂曰虎臣緩援旣集而  
大難時弭德濟封域之內威揚函夏之表遂仍  
世作宰焜曜祖業車實襲軌裘不改帶元勳曷  
於光國洪烈著於隆家考德計功比之前代未  
有茂於此者也是以小子敢慕徽猷欽述芳烈  
雖不足以當朱弦之一唱發清廟之三歎蓋爾  
臣子之遺恩罔極之所處也乃作頌曰  
悠悠聖緒上帝是臨世篤其猷于顯徽育神風  
往播福祿來尋靈根旣茂萬葉垂林繁盛海堦



穎寧漢陰旣曰寧止芳祐允淑乃步斯淳降神  
有陸赫矣二公應期載育明明邵侯允哲允謀  
叡心昭德叔問宣猷如日之升如川之至炎精  
旣頽黃揮曷煥光宅海邦大造江漢王于出征  
二公斯難長驅致屆九有有判咸黜凶醜區域  
寧宴天祿未終大命有集卜食東夏元龜旣襲  
聿來耶宮作蕃舊邑公徒斯振帝旅凱入於變

時雍神道經始肅肅九命永言徽止公拜稽首  
對敷天子猗歟盛歟邵侯有作我考纂戎爰究  
爰度遠除尋軌崇基式廓昭明有家祖廟奕奕  
中葉虎臣稱亂西秦靈旆電揮伐鼓霆震會朝  
哀舉征不浹辰遐風遠掃萬里無塵有族斯祐  
念功在茲袞衣之宜遂作上司台光增朗方險  
載夷穆矣暉章有吳之旗我祖我考受言藏之



曄曄藻裳再命同服駢駢四牡二世方轂分珪  
比瑞天秩底祿公堂駿趾華構重屋昔在二伊  
于殷有聲在漢之興亦曰韋平惟祖惟考履貞  
大亨邈彼披陽追蹤阿衡駿惠雨施景潤雲行  
洋洋玄化功濟其民風馳海表光被嶽濱二后  
重規世有哲人肅雍碩響萬載是振

張二侯頌

張氏之先蓋少昊氏之苗裔也其在春秋晉德  
方休而張老延譽爰暨有漢文成佐命初基司  
空揚聲於末葉流長祚遠世 乏侯輔吳將軍  
文侯遭季末雲擾遂避難于東有吳之興實爲  
謀主栢即世援建太祖知命審於將萌先識鏡  
於未兆遂作上將輔成王業立朝無不易之方  
正色有犯顏之亮固所謂蹇蹇王臣古之遺直



者也奮威將軍定侯明德光遠軌量弘濟文敏  
足以華國威畧足以振衆重規繼體而大業暉  
崇故休祚頻繁寵靈仍世天秩之體彌彰而毀  
盈之心茲冲用能保寵固世考終碩問蓋竹帛  
之所光宣詠歌之揄揚也乃作頌曰

烈文遠祖肇自上皇金天淳曜遂濟窮瘁真人  
有作飛龍在天畱侯載見階雲自淵即謀神造

啟運妙玄有漢再命度邑于東其中葉誕育  
司空邈矣唐陵有恭斯庸寧行盈止世篤天祿  
神之聽思俾我戩穀繁過芳祐底之洪族洪族  
旣昌再惠音徽於穆二侯仍世雙飛堂堂輔吳  
抑抑奮威如龍之躍如鳳之揮薄言戾止在彼  
紫微金卯紛若四海畔換文侯乃顧妙世達觀  
逝彼塗方度茲江漢鳴飛遵海聿來有亂遭家



不造殲我明聖栢后肇揚侯承末命皇大烝哉  
天保未定匪侯卹度宗緒孰正帝整我旅外薄  
四荒命作惟師時惟鷹揚遂登上將亮彼大皇  
底邑胙土命珪有璋蹇蹇我侯明發宿夜襲彼  
遺直興言有暮聿懷來忠王室之故猗歟定侯  
祇服清曜奕奕瓊範玉潤淑貌淵謂往藏朗思  
來照曾是徽章再世被荷庸勲開國明道隆家  
苾苾其芬淑問楊和有蔚其文如林之華皇矣  
帝祚受言旣崇女有行作合儲宮條延延紫極  
穎衍皇寧豐豐定侯在盈思冲祇寵戒溢永懷  
慎終重光並曜播我芳風

榮啟期讚

榮啟期者周時人也值衰世之季末當王道頽  
凌遂隱居窮處遺物求已泝懷玄妙之門求意



希微之域天子不得而臣諸侯不得而友行年  
九十被裘鼓琴而歌孔子過之問曰先生何樂  
荅曰吾樂甚多天生萬物唯人爲貴吾得爲人  
矣是一樂也以男爲貴吾又得爲男是二樂也  
或皆不免於襁裸而吾行年九十是三樂也夫  
貧者士之常也死固命之終也居常待終當何  
憂乎孔子聽其音爲之三日悲常被裘帶索行  
吟於路曰吾著裘者何求帶索者何索遂放志  
一丘滅景榛藪居真思樂之林利涉忘憂之沼  
以卒其天年榮華溢世不足以盈其心萬物兼  
陳不足以易其樂絕景雲霄之表志濯北溟之  
津豈非天真至素體正含和者哉友人有圖其  
象者命爲之讚其辭曰  
芒芒至道天啟德心自昔逸民遁志山林邈矣



先生如龍之潛夷明收察滅跡在陰傲世求已  
遺物自欽景遯瓊輝響和絕音戀彼丘園研道  
之微思樂寒泉薄採春蕤鳴弦清泛撫節高徽  
有聖戾止永言傷悲天造草昧負道實嘉於鑠  
先生旣體斯和熊羆作祥黃髮皤皤耽此三樂  
遺彼世華翼翼彼路行吟以遊的的黻冕陋我  
輕裘永脫亂世受言一丘媚茲常道聊以忘憂

嘲褚常侍

六年正月前臨川府丞褚老常侍君子謂吳如  
是乎能官人官人國之所廢興也古之興王唯  
賢是與呂望漁釣而周王枉駕甯戚叩角而齊  
王忘寐委斯徒而靡好爵釋短褐而服龍章姬  
姜之族非無人也親昵之愛非無懷也取彼庸  
賤之徒登之佐臣之列故九賢翼翼世而有命旣



集五子佐時匡霸以濟夫唯能官人之所由也  
褚氏大夫之常佐遠邦之賤司才則邵矣官實  
陋矣而拔出群萃超昇階闈雖文王登師桓公  
取佐亦何以加之詩曰濟濟多士文王以寧言  
官人得才也褚常侍聞之喜曰君子之言豈虛  
也哉吾得此足矣君子謂褚常侍於是乎不謙  
謙也者致敬以存其位也謙之不存德無柄

矣世之治也君子自以爲不足故撙節以求役  
于禮敬讓以求安于仁世之亂也在位者自以  
爲有餘故爵豐而求更厚位隆而欲復廣世之  
治教恒由此作今褚侯蟬蛻利木鵠鳴玉堂不  
庶幾夙夜允集衆譽而意克於一善心盈於自  
足足則無求盈則無戒不求則善遠之無戒則  
惡來之亦何以爲君子哉詩曰戰戰兢兢如臨



深淵慎之至也褚常侍聞是言也懼謂之昌言也而拜之君子曰褚侯其幾矣聞善而喜過又應之懼嘉服義之賢而拜讜言之辱規同禹迹義均罪已君子哉吳無君子斯焉取斯

牛責季友

天造草昧萬物化淳類族殊品莫向乎人令子履方象以矩地戴圓規以儀天該芳靈之疑素

挺協氣於皓玄故神窮來思洞無間踊翰則憤凌洪波吐辭則辨解連環子何不絕淵而躍照日之光使穎秀暘谷景溢扶桑俯經見龍之輝仰集天人之堂雖子之服旣未而素今子之滯年時云暮而冕不易物車不改度子何不使玄貂左弭華蟬右顧令牛朝服青軒夕駕輶輅望紫微而風行踐蘭塗而安步而崎嶇隴坂息



士龍集卷之六  
駕郊牧玉容含楚孤牛在疾何子崇道與德而  
遺貴與富之甚哉日月逝矣歲聿其暮嗟乎季  
友盛時可惜迨良期於風柔競悲飈於葉落陳  
讜言於洪範圍形於霄閣使景絕而音流芬身  
薦而榮赫奕子如不能建功以及時予請迹於  
桃林之薄

陸士龍文集卷之六

終



卷之三